

الحق عند المحبريين

روشان صفا

الطبعة الأولى

الكتاب: الحب عند المصريين

المؤلف: روشان صفا

تصنيف الكتاب: مقالات

تصميم وإخراج: م / هشام أنور

المقاس: 20×14

رقم الإيداع: 2377 - 2014

الترقيم الدولي: 5 - 030 - 776 - 977 - 978

التجهيزات الفنية والطباعة

دار يسطرون

للطباعة والنشر والتوزيع

طباعة وتوزيع الكتب في جميع أنحاء العالم

المطبعة: ٢٨ ش ضياء - الهرم - الجيزة

المكتبة: ٣ ش صفوت - محطة المطبعة

شارع الملك فيصل - الجيزة

جمهورية مصر العربية

٠١٢٢٩٣٠٠٠٢٩ - ٠١١٥٧٧٦٠٠٥٣

جميع الحقوق محفوظة

الإهداء

إلى روح أبي الغالي المرحوم هاشم صفا
وإلى قرّة عيني ومهجة قلبي من تحملت معي الأوقات
العصيبة الصغيرة جهاد
وإلى الأعزاء مصطفى ويسرا ورائيا
إلى كل اصدقائي واحبابي من دعموني وقدموا لي
النصيحة
إلى كل من يملك بين ضلوعه قلب ينبض بالخير

روشان صفا

المقدمة

فى زمن فقد كل شئ معناه و قيمته و صارت الكلمات التى
تعبر عن الحب بين


الناس تقال بكل سهولة ، تقال ليل نهار بمناسبة و بلا مناسبة ،
تقال فى الرسائل و على النت بكل وسائله و تطبيقاته شات
وواتس و فيبر ، وهناك الملايين من الناس لديهم سداجة مفرطة
تجعلهم يصدقون هذه الكلمة ويعيشون فيها ، أما النصف الآخر
من الناس هم من يقولونها ليستفيدوا من تصديق النصف الأول
لها ، وقليل منهم الصادق المخلص ، ولن أحصر الطرف الساذج
فى السيدات والطرف الكاذب فى الرجال و لكن الغالبية هى
هذا التقسيم ، والسبب هو أن المرأة قليلة التجربة قليلة الخبرة
، وعاطفية بطبيعتها والعكس الرجل فهو دائما الواد المخضرم
المجرب فى المرأة كل شئ ، ولذا حاولت أن أتمس طريقا أعرف
من خلاله ما الذى أوصل المصريين لهذا الواقع الأليم الممتلئ

بالمشاعر السلبية والتجارب المبكية التى جعلت كثيرا من
الناس متجمدين جمود الصخر وقساة قسوة الحديد، والبعض
الآخر رقيقا رقة الحرير يسعد بكلمة جميلة حتى وإن كانت كاذبة
ويصدقها، وأتمنى أن أصل معكم إلى اللحظة التى نعيش فيها كلنا
بسعادة ، وننعم بحب صادق مخلص ، وهذا لن يحدث إلا فى حالة
واحدة وهى أن نضع أيدينا على المشكلة وتحلل أسبابها ،

وأول مشكلة هى الحب وذلك لأن الحب هو أساس الحياة
و الكون، فمن يعمل ليلا و نهارا فمن المؤكد أن هناك مسؤولية
جسيمة تجاه إعالة أولاده وبيته مغلضة بحب شديد لهم وهو ما
دفعه للعمل طوال اليوم و السيدة التى تعمل فى بيتها و بره بيتها لا
تكل ولا تمل فتفق أن بداخلها دافعا قويا نابعا من محبة للأولاد أو
للزوج ، لذا كان من الضرورى التأمل و دراسة هذا المحرك الذى
جعلنا نضحى إما بالمال أو العمر أو بالعمل من أجل من نحب ، و
فى وسط كل هذه التضحيات نجد أناسا تقابل هذه التضحيات
بالجحود و نكران الجميل بل أكثر من ذلك فقد وصل الأمر إلى حد
الإيذاء بكل صوره، وظهرت فى مجتمعنا مشاكل غريبة علينا وعلى
عاداتنا و تقاليدنا لم تكن موجودة من قبل ويحتار العقل و القلب

فى حلها ، وهل نستمر صامتين أم نصرخ فى وجه من نعانى معه ،
وفى الحالتين لن نحل المشكلة لا بالصمت ولا بالصراخ ولكن معا
سنفهم أسبابها علنا نصل لحل نسهل به .

مرمر و کاری



إحنا أعظم شعب بين الشعوب، أيوه بجد كل حاجة عندنا غير كل الناس ، تبص من ناحية تلاقى أهرامات عجزت البشرية عن فهم طريقة بناها ومن ناحية ثانية تلاقى جثث محنطة آلاف السنين فى حين أنك لو سبت رغيف عيش ثلاث أيام ها يظهر عليه العفن، وآثار ومعايد وتيل عظيم ، وحتى قناة السويس حفرناها بأيدينا مش بأى آلات . و النتيجة إننا شعب مختلف فى كل شئ حتى فى الحب ، تلاقى الحب عندنا زى الأهرامات غير واضح و غير مفهوم ، معقد ومحير مع أنه عبارة عن شوية مشاعر .

من أول الولد و البنات ما يفتحوا عينيهم على الدنيا يشوفوا الأفلام اللى بيقلوها عليها جميلة وهى فى الحقيقة أكبر إفساد لنظرية الحب من أساسها وأكبر مثال على كده الفيلم الرومانسى

الرائع شارع الحب، طبعاً من الاسم كده - بسم الله - هانشوف
الحب بقة ونتعلم ،وتبدأ البنت المصرية تتصدم شوية شوية من
غير ما تحس وفي نفس الوقت يبدأ الشاب اللي بيتعلم إزاي يحب
يفهم الحب بطريقة الفيلم ، والتحول فى شخصيته يتم بلا أى
مقاومة. وأهم شخصيات الفيلم منعم وحسب الله وجادليو، وأول
قصة هي قصة جدليو المحطم اللي حب وأخلص لمراته وخانته
وقتلها .

وأول سلبية يستقبلها الشاب المصري هي: اوعى تحب وتخلص
لأى بنت لأنها هاتخونك يعني خلي قلبك في إيدك ولا تقدم لها أى
شئ .

وتانى قصة هي قصة الرائع منعم وهو شخص فقير وقصير
وقليل البنيان يحب كريمة ملكة الجمال ! وهى أطول منه وأغنى منه
يمراحل و بنت باشا ، لا وكمان كارى وصديقتها مرمر بيتخانقوا
عليه - و الله مصيبة - ويجي بقة يوم عيد ميلادها وهي عاملة
حفلة كبيرة وعازمه المايسترو العظيم علشان سي منعم يتعرف
ويتشهر وهو جاى على الجاهز وعاصر على نفسه لمونه وهى

عامله كل حاجة لوحدها علشانه والمفاجأة هدية منعم لكريمة أغنية هو عملها ، يا فرحتي بيك يا سي منعم إنت واللي بيتفرجوا عليك وبيتعلموا منك ، ما قدرتش تحوش من مرتبك اللي كانت هي بتدفعهولك وتجبلها منه هدية ، خسارة فيها ؟ صح ! حتي لو كانت متواضعة ، إنما سي منعم قال اضرب عصفورين بحجر واحد ، أهديها للحن وأسمعوا للناس وأوفر فلوسي !

يا سلام على الشباب اللي بيتفرجوا علي هذا المنعم العظيم ، بيداً الشاب المصرى يشوف نفسه و يتعامل بمنطق أنا لوحدي هدية و المهم إنه ترك كريمة ومشى ، على إيه نفسى أفهم ، أكيد هو عارف إنها هبله و بتحبه عشان كده بيتقل .

و التالت اللي جاب من الآخر حسب الله وحكايته مع تترتو اللي هي أرملة ووحداية و غنية ومصيبتها إنها بتحبه ، تقوم تصرف عليه هو والفرقة وجدليو ومنعم عشان البيه يسد منخيره و يتجوزها ، ويتأكد إنها أكلت فرقة التنايلة و شربوا الشاي والقهوة ، حتى يرضى عنها ، ويا سلام لما يفترى على النعمة ،

و يقول « ناس ليها بخت و ناس ليها تترتو » ، و كل التعب و شدة

الأعصاب دى علشان سبع البرمبه سى منعم ببقى نجم وكأنه لازم
كل الناس تخدم حلم هذا الإنسان وكمان كريمة الجميلة تستجدي
منه الحب والعطف لها ،وهو يتمنع !

فماذا تتوقع ممن يشاهد هذه الدراما الفاشلة بكل إشاراتهما
السلبية تجاه المجتمع ؟

وندخل على الدرس الخصوصى المركز فى قلة الأصل وتعليم
الشباب إزاي يكونوا مساكين وفى الحقيقة هم ذئاب بشرية تمشى
على الأرض، فيلم شباب امرأة طبعاً هاتقولولى نعم هأقولكم
نعمين، هو الأستاذ إمام يا حرام كان متكتف؟ ولا مش فاهم مثلاً ،
كله كان برضاه و بمزاجه ،وهى عملت زى ترتر سكنته و أكلته
و أهم حاجة اتجوزته ، إنما هو إنسان نذل أخذ فلوسها و لبس
البدل و خربها ، لكن برضو هى غولة بتاكل العيال ،وهوعيل نونو
يا حرام ، وللعلم فى بلدهم بيد جوز الواحد فى نفس عمره عادى ،
و الصدمة إنه يكافئ هذا الإمام أولاً بإنه تركها و رماها واتجوز
بنت بكر جميلة و صغيرة وهيله ،

وكان عقاب شفعات، فى الأول مصاريف وفى الآخر خيانة و قتل!

والرسالة القوية و المباشرة للرجل المصري هي كالآتي«يلا
مايهمكش إنت لو جتلك فرصة اخربها و خد فلوسها و اتجوزها
و بعدين ارميها و ربنا هايكرمك زى ما كرم إمام و تاخد وردة
مفتحة و تعمل عيلة» ، و إنت يعنى كنت هاتعمل إيه يلا مايهمكش
يا راجل ماهى شفعات كانت تستاهل.

و كنت أتمنى فى نهاية فيلم شباب إمراة أن يعاقب إمام كما
عوقبت شفعات ، إنما هذا هو الرجل المصرى دائماً يضع المرأة
فى خانة المتهمة وهو البرئ حتى و لو كان ذنباً بشرياً ،

وفى نهاية الفيلم ينتصر الخير المزيف ؟

واترسخت الفكرة فى دماغ الراجل المشاهد، إنه لازم الست
تضحى بكل شئ حتى بحياتها من أجل الرجل ، وهو مايعملش أى
حاجة عشانها !

و من هى التى تستطيع أن تغير هذه الفكرة فى دماغ هذا
الرجل المتمرد المدلل من كل من حوله، فهو الذكر الذى يحمل
اسم العيلة والدلال قليل عليه ، فأمه و جدوده و أخواته و أعمامه و
أخواله كلهم يشعلون جذوة الفساد والظلم بداخله من أجل أنه هو
الذكر فقط لا لأى شئ آخر .

حب الفلا حين



و نيجى للحب القوي الهادر الذى لا يقف أمامه أى احد، هو حب
الفلاحين حيث الأصل و الجذور، البنت هناك يدوب كده ما شاء
الله تتم أربعة عشر عاما و تكبر شويه بيبدأ الشباب بعمل دراسة
وافية عنها تشمل الأرض أى الطين اللى يملكه أبوها وهاتورث كام
فدان ؟ وهل عندهم أملاك أخرى مثلا بيوت أو بهائم ؟ وفى حالة
إنه كله تمام يبقى الحب يطلع و يكون أقوى من حب روميو بدون
جولييت لأن فى أريافنا مفيش جولييت ! و لازم صاحبنا يشتري
شبكة قوية و يكون عاطفى ورومانسى و يقلد أهل اليندر ويشغل
عبد الحليم حافظ ليل ونهار حتى يتم المراد و تتم الموافقة عليه .
و مبدئيا البيت هو غرفة فى بيت أهله والباقي على العروسة ،
أما بعد الزواج ومن أول يوم ينزل صاحبنا الأرض بتاعة أبوها ،

و يقول بكل بجاحة: فين أرض مراتي عشان أشغلها،

وفى حالة الرفض - يعني أرض مين - يقول.... ميراثها !،

والمصيبة إن هذه البنت ذات الاربعة عشر ربيعا تصدقه و
تتبعه لأن هذا الرجل لو تفتكروا تعب فى الأول أغانى و حب و رايح
جاي قدام البيت ، فتوافق على كل ما يقول و يتحول أهلها فى
لحظة إلى ناس طماعه مش عاوزين يدوها حقها و النتيجة
أنها تعيش بين نارين . نار الزوج الطماع و نار الأهل الخائفين
عليها .

و يبقى الحال كما هو و تعيش المسكينة فى مشاكل و نكد لحد
ما تورث ،

وفى حالة إنها ورثت و فى لحظة تهبط الثروة على رأس
صاحبنا ، و فورا تباع الأرض كلها ، وهناك خيارات متاحة أمامها
للى هايعملوا هو بفلوسها «!!!!!!!!!!!!!!»

إما إنه «يشترى أرض تانية جنب أرضه باسمه و بفلوسها»
أو «يروح يحج و يعمل عمرة لوحده و طبعا بفلوسها «و الخيار

التالت اللى ممكن يكون فيه أدنى نفع لها هو» إنه بينى بيت باسمه
و تعيش هى فيه بفلوسها برضو» فى حالات قليلة يعنى يضحى
و يشتريها غويشتين ذهب عشان بس كلام الناس، و فى حالة
حدوث رفض منها يكون الطلاق السريع!!!!

والمجتمع الريفى عندنا فى مصر يرفض المراه التى تعارض
! لأنها ستغير المنظومة السائدة منذ مئات السنين و الغريب إن
أم هذا الشاب أيضا انتقلت أملاكها طواعية إلى زوجها و دائما
هى مؤيدة لهذا الأمر طالما إن ابنها هو المستفيد و فى حالة
ابنتها فهى تقاوم على استحياء و فى النهاية ليس أمامها سوى
الاستسلام .

وبنات الريف التى تعيش فى القاهرة و لها ميراث أرض زراعية
، فكل ما تجنيه هذه الأراضي من أرباح مالية يذهب لهذا الزوج
ويفتح له مائة سكة (زي سيارة جديدة أو شقة جديدة باسمه ، أو
تسديد بطاقته الائتمانية التى يكون فيها الدين عليه مساويا لما
يأتى من أرباح هذه الأرض، وهذه ليست مبالغة فهذا هو الواقع
الحقيقى لما نعيشه و لا أعلم هل تعلمنا من الأفلام أم نقلت

الأفلام واقعنا المريض ،

و فيلم الزوجة الثانية نشاهد حفيظة التى تركت مائتي فدان
و لم تطاب بأرباحها عشرين سنة لهذا العمدة لا و لم يرحمها أو
يقدر لها ذلك و المكافأه لها أنه تزوج عليها و حرق قلبها .

و فيلم أفواه وأرانب تعرض لنقطة تنابلة السلطان اللى بيعيشوا
على بيع النساء للى يقدر يدفع ، و لما رفضت بعد أن تحملت
مسؤولية عيله بأكملها ، و جدت نفسها متجوزه بدون علمها !

و هذه الشخصية تكررت كثيرا فى مجتمعنا - لكن مع زوج
خليجى مليونير-

،والمهم أن الحب يرفرف على هذه الأسر مادامت المرأة تدفع
كل ما تكسب. والغريب أن هذا الرجل الطفيلى دائما ما يكون
متعكر المزاج لا لشيئ سوى ؟

أن ما يأخذه من مراته لا يكفي لتوفير طلباته التافهة .

حب العلماء

و برغم كل هذه المآسي التي نراها محيطة بنا لم أر أو أسمع
أو أشاهد مثل حب العظماء ، عفا العلماء ، وهم أكبر خدعة
صدقناها في هذا الزمن ، لم يجرؤ أحد على توضيح أو شرح
طبيعة الحب الذي يعيشونه إلا أنني درستّه وفهمته أخيرا ،

فأول صفاته أنه هو الحب المدروس اللي معمول له ماجستير
و دكتوراه، وبمعنى أدق هو حب الذات أي الأنا فقط و لا أحد
غيرها، و يأتي الحب المدروس هذا في خدمة أحلام و طموحات
هذا الإنسان ، وهو بالأمس كان ذلك التلميذ الذي يبكي طوال
اليوم الدراسي حتى موعد الانصراف لأنه نقص ربع درجة في
امتحان الشهر،

ويتجمع حوله أصحابه علشان يهونوا عليه مصيبة ربع الدرجة
ولا فائدة .

فهذا التلميذ هو أول دفعته علميا و آخرها عاطفيا و اجتماعيا .
ونتكلم شوية عن طبيعة هذا الحب المتذاكر اللى يذهب
بالمرأة إلى الموت ،

و أعراض الوقوع فى الحب تظهر عليه بوضوح وهى كالاتى:
تشوف القلب اللى بيدق بسرعة و صوت ضرباته أعلى
من صوت دقات ساعة الجامعة ، و يصفر الوجه ، و تبرد
الاطراف ، و تتنابه قشعريرة الحب والعرق يتصبب منه ليه يات
رى؟..... هايقابل المشرف!!!!!!

. أيوه المشرف - مش الحبيبة - و تتبادر الاسئلة فى عقله يا ترى
هايوافق على نقطة البحث ولا هايرميها فى وشى عشان النقطة دى
اتهرست قبل كده فى مئات الأبحاث المكدسة فى أدراج المراكز
البحثية ، و يظل فى هذه الحالة المزرية حتى يوافق المشرف على
المقترح البحثى المقدم .

ويقضى عمره كله سهران بين القراءة و البحث و التلخيص
و ليس من مشاهدة القمر والنجوم والشوق . لرؤية حبيبته . مثلاً
، و لما يصحى يجري على أقرب مكتبة يشتري مراجع وكتب .
بدل الدباديب والقلوب والهدايا . ، وقرأ كل قصائد الشعر والغزل
عفوا : سامحوني أقصد أحدث ما تم نشره فى المجال ،

فهو يحب فى حرفين يسهر الأيام و الليالى و يدوس على
كل نفيس و غالى و يرسم الخطط طويلة الأجل و قصيرة الأجل
للوصول لهذين الحرفين وهما (أ.د.) وهما الأستاذ - الدكتور .

ولو بصينا على تعيسة الحظ منكوبة العمر التى تتزوج من
أجل التكفير عن ذنوب أبناء وبنات آدم و حواء ، فهى تعيش مع
الشخص الذى ييجيله اكتئاب لو تأخر أسبوع عن موعد تسجيل
الدراسات العليا ، وهى تعيش فى مكتبة عامة ممنوع فيها كل
شئ وأول الممنوعات هو الكلام لأنه رغى و دوشة على الفاضى
، ويشتت التركيز فى النقطة السوداء التى صاحبنا يدرسها
، وممنوع الزيارات ، وممنوع الكلام فى التليفون ، وأن يكون لها
صديقات فهذا كله يعتبر كارثة .

الدورات سواء لغات أو كمبيوتر. وشراء الهدايا - عفوا سامحوني أقصد المراجع العلمية اللى اتكتبت فى النقطة السوداء من أول ما طلع شئ اسمه كتاب حتى يومنا هذا ، و الذهاب إلى أبعد مدى و أبعد الحدود خلف المعلومة.

و المظهر المحترم من أهم اهتمامات هذا الشخص ؟ يعنى لازم بدل و كرفقات حتى تكتمل الصورة المزيفة ليتمكن من خداع المجتمع .

و من أسوأ صفاته أنه متعال لأبعد الحدود وخاصة إذا تمكن من صعود سلم الترقيات ، فهو فى نظر نفسه الوحيد فى هذا العالم اللى بيفهم وتجده بيفتى فى كل شئ حتى فى غسيل الأطباق، و كل المحيطين به من أهل و أصحاب لازم يحترموه و لازم هو يطلعهم بهائم ، و يصادر على كلامهم متحيزا لرأيه بشدة.

ونفسى أقوله كلمة واحدة: إنت بتفهم فى مجال دراستك بس لأنك ببساطة أعطيته كل وقتك يعنى ارحمنا شويه ،

و بعد رحلة الأبحاث والهم وصل صاحبنا إلى الحرفين السحريين (أ.د.) ، و تبدأ رحلة حب من نوع مختلف ألا وهى

رحلة» حب الأموال»، يعنى منحة هنا إعاره هناك، كتاب ينزل للطلبة و لازم يشتروه وإلا الرسوب، انتداب فى جامعة خاصة دروس خصوصية لطلبة هندسة وطب أو استشارات لشركات أو للحكومة .

و لو رجعنا للأصل هنلاقى أنه كان بيدور على الفلوس و مش لاقبها فقرر يوصلها مع الاحترام ، الذى وصفه عادل امام و قال «بلد بتاعت شهادات صحيح»

وبعد التفكير فى شخصيته تكتشف الزوجة أنه مزيف لأبعد الحدود، يدعي الأخلاق وهو عديمها يدعي الحب و العطف والحنان وهو أقسى من الحجر لا يرق قلبه لأحد فى هذا الكون إلا نفسه و يدعي الكرم و هو لا يفتح باب بيته لأحد .

وله شخصيتان الأولى أمام أهله و أصحابه و هو فيها متعال متكبر .

أما الشخصية الأخرى فهى «قطعة خايفة و جبانة أمام المشرفين ومحكمي الأبحاث اللى بكلمة منهم ممكن يعطوه الدرجة أو يرفضوا الرسالة و يطيروه» .

وفي نظري هم ليسوا علماء إنما هم عاشقون للقب ،

والدليل على ده أننا كمصريين بنعاني من حوالى مائة سنة
وأكثر من الجهل و التخلف العلمى ، وأصبحنا فى ذيل الأمم ،حتى
الهنود سبقونا ، و تفوقوا فى إنتاج السوفت ويرعالميا ،وأضافوا
لوطنهم فى كل شئ ، إنما علمائنا المصريين اللى يحبوا مصر!
طوروا ولكن خارج مصر.....!

ويرد عليا واحد منهم يقولى» الحكومة مبتصرفش على البحث
العلمى» .

والرد الواضح على ده أنه :

«خسارة كبيرة أن تنفق الدولة على أبحاث متكررة و مركونة
على أرفف مراكز البحوث ، فأنتم لا تبحثون فى حل مشاكل
المجتمع أو تبتكرون أي شئ لخدمة الناس، إنما تبحثون وتتعبون
من أجل حرفين فقط ألا وهما (أ.د.)

وليه ؟عشان تطلعوا على أوروبا وأمريكا ومنها على دول النفط،
لحصد الاموال

و لو كانت أبحاثكم مفيدة لكانت مصرنا الحبيبة فى الصفوف
الأولى للدول المتقدمة.

و مع الأسف علماء مصرهم تجار علم ، و كثير منهم تنازل
عن جنسيته المصرية ، للحصول على المزايا المادية الممنوحة
للعلماء فى أى بلد أخرى ، فالعلم بالنسبة لهم هو وسيلة لجمع
المال و الحصول على فرصة حياة كريمة فى أى بلد أجنبى و ليس
غاية لتقدم مصر و رفعتها ،

ورسالتى لأى بنت تتعرض لتجربة الارتباط بأول دفعته لسوء
بختها ،

اعرفى إنه أنانى جدا و مبيحبش إلا نفسه و لازم تركنى شهاداته
كلها على الرف و لا تتخدى بتفوقه العلمى الذى ليس له أى علاقة
بالتفوق الأخلاقى. و لازم تفهمى هذه الشخصية جيدا و تعرفى
أخلاقه و طباعه تعرفى عيوبه التى يخفيها خلف تعيينه فى أحسن
الأماكن .

و هل هو كإنسان يستاهلك أم لا ؟

و يستحسن يا بنتي إنك ترفضى لأنك هاتخسرى نفسك
هاتخسرى حياتك ، أنا قلت و خلاص و إنتى حرة.

حب المشايخ



و عشان تكمل على المرأة المصرية من كل النواحي و تكون راضية و مبسوطة و موافقة على كل اللي بيتعمل فيها .

جابهوا وعملوا حاجة اسمها «دروس دينية» ياخدوا الستات صباحا ساعتين و الستات بس ؟ و هما ساعتين كفاية اوى و تتملي دماغها بطاعة الزوج و تجنب الجدل والتفانى فى خدمته . و مع كده تكون جميلة و تهينى كل الظروف له و كل حاجة لازم تكون ميه ميه ،

و المدخل إن صاحبنا هو اللي هايدخلها الجنة - ده على إعتبار إنه هو أصلا هايدخلها ؟ عشان يدخلها هي ؟ ، وبعد كام درس حلو كده تلاقى الستات بدأت تتحول إلى كائنات هلامية لا شخصية و

لا رأى ولا كيان ،

مفيش عندها غير حاضر ونعم ظنا منها أن هذا الوضع فى
مرضاة الزوج هو فى مرضاة لله ، وأول حاجة نشوقها هى العباية
، للعلم العباية شئ جميل و حشمة ولكنها تحولت إلى زي رسمي
يلبس صيفا و شتاء ، وما أدراكم ما العباية ، هى فستان حرير ، و
فى الصيف تكون درجة الحرارة خمسة و أربعين درجة كأن الست
لا بسة بدلة ساونا و تلاقىها بتجيب عرق من كل مكان ،

و فى الشتاء أسوأ وأضل سبيلا ، الجو برد جدا و- برضو العباية
الحرير -

وتنزل درجة الحرارة إلى ١٠ مئوية ، طيب وما الحل فى البرد ؟
و بما إننا مصريين لازم نفتكس ونلبسها حاجة عشان البرد
ممكن جاكيت فوق العباية - بيبقى شكلها عامل زي المخبرين - ،
خلاص بلاش الجاكيت .

ممكن شال ، مش عامل حاجة ، لأنه بيدفى الأكتاف فقط !
إذن الحل الأمثل للمرأة المصرية حفيدة نفرتيتى و شجرة

الدر إنها تلبس جلابية شتوي تحت العباية ، و مش مهم تكون
عامله زى الكرنبة المحشية هدوم ، لكن المهم تكون العباية
سوداء من بره ،

ومع إن هناك ألف خامة قماش شتوي ، وصيفى هناك الأقطان
و الكتان والاصواف و مش هاتقلل أبدا من الشكل المحتشم .

و لكن صاحبنا مبسوط كده و بيقول فى نفسه « أهى مدارية فى
العباية و موفرة بند لبسها » و يوم ما تشتري عباية جديدة تشيلها
للمناسبات !.

والمهم فى الموضوع إن الرجالة لاتحضر هذه الدروس أبدا و
بيقولوا عليها تضيق وقت ، فيظل الرجل كما هو بل يزداد جبروت
و تكبر و سيطرة على هذه المرأة و إيه اللي هايمنعه ؟ عنده كائن
مؤهل و أرض خصبة حتى يستعيد هذه المخلوقة المسكينة التى
حُرم عليها كل شئ ، وُسِّلت منها كل حقوقها باسم الدين ، و الدين
يرئ من ظلم الناس ، و يأتى المشايخ اللى قلب الواحد فيهم رقيق
جدا فهو لا يهدأ أو يرتاح له بال حتى يتزوج أربعة و الحب عنده
ملتهب دائما و عيونه دائما تبحت عن امرأة جميلة و يا سلام لو

مش محجبة و يدعى إنه عاوز يتجوزها عشان يهديها و يحجبها حتى يعطى لنفسه مبرر غير قابل للنقاش ، ولكن فى الحقيقة هو بيكمل المجموعة، إذا عنده لون ناقص مثلا الشقراء أو الصهباء أو السمراء أو سن ناقص يعنى الصغيرة و الوسط وفوق الوسط فهو لا يتردد لحظة فى الإقدام على الارتباط فورا وبدون أي تفكير عشان يكمل المجموعة . وعلاقة الحب تدوم شهرين ليس أكثر وهما أول الزواج.....!!!!

و بعدين خلاص بح «خشي يا أختاه اركني جنب إخوانك» .

و من فوايد الستات بعد غسيل الدماغ هى الطاعة السياسية ، فهى تمثل كتلة تصويتية هائلة تنجح أي مرشح بأمر الله.

وتلاقيها فى المواسم الانتخابية معاها ورقة مكتوب عليها الرمز و تدخل تصوت و تخرج بلا تفكير أو سؤال عن هذا المرشح أو إمكانياته ، المهم إن انتخابه هيدخلها الجنة!!! و برضو بتتفع فى المظاهرات والوقفات.

و أنا معنديش مشكلة من مشاركة المرأة السياسية بس لازم تكون بكامل حريتها و دون التأثير عليها من زوج أو جماعة أو فتوى دينية .

حب الوطن

يا حبيبتي يا مصر لو أعدلكوا الأغاني الوطنية اللي اتعملت عن
حب مصر يجوكده حاجة و خمسين أغنية و مصر هي أكثر بلد
شعبها بيقول إنه بيحبها ، و الحب ده باين حب
.....عميك عميك !

كتبولها شعر وعملولها أغاني وطنية كتير يعنى حب صادق
!.....

صادق مين؟ ده إحنا أكبر شعب مدعى الحب والوطنية وفي
الحقيقة كلنا نعلم حجم الزيف فى المشاعر تجاه مصر .

، عاوز تعرف حجم الحقيقة المرة اطلع بره مصر أسبوع
سياحة فى أي بلد عربى أو أجنبى هاتعرف و تشوف بعينيك

إن مصر دى معمول عليها مؤامرة مش من الغرب زى مرضى
السياسة ما بيقولوا إنما معمول عليها مؤامرة من شعبها اللي
بيقول أنه بيعبها .

ومن شدة حب الشعب ده لبلده إنه بيرمي الزباله فى شوارعها ،
و بيسأل مين اللي بيرمي الزباله ؟ الجواب طبعاً مش المصريين
العظماء هما اللي بيعملوا كده !

دى كائنات فضائية هى اللي بتيجى ترمي الزباله الفضائية فى
شوارع مصر ، و تطلع الفضاء تاني

و أكبر فئة بتحب مصر هى موظفين الأحياء و الأحسن
نسميهم موظفين الأموات لأنهم قتلوا الأمل فينا بالعيش فى أحياء
سكنية لا تصلح للاستعمال الآدمي ، فكل أحياء الدنيا تقوم على
التخطيط العمرانى وتخطيط الشوارع وتحديد أماكن للبارك و
زراعة مساحات خضراء وتحديد كحداائق ومنتزهات عامة ،

وتحديد صارم لارتفاع العمارات ، وفتح أسواق مجمعة فى كل

حي !

و من شدة حب موظفين الحى لمصر تركوا أحيائها تطلع زى
لوحة القسيقساء

يعنى على كل لون يا باطسطه»

كل واحد يتعامل معاها براحتة و كيف نفسه على الإبداع
الغير المفهوم فيها ،

و كان نتيجة العلاقة العاطفية الساخنة السرية بين المقاولين
الصعايدة و موظفين الاحياء هو«هذا الطفل المشوه و اسمه
الحى».

والكلمه اللى بتجبلى حالة عصبية هى كلمة بلدية بس مش
بلدية القاهرة طبعا.....!

نقول بلدية دى أو بلدية نيويورك، وعشان الدمل يتفقع، بلدية
اسطانبول أو بلدية أمستردام و باتت الحقيقة وهى « إنهم بيكرهوا
بلادهم أوى »

«وانا كان نفسى يتعلموا مننا حب مصر و نتعلم منهم إحنا
كراهيتهم لبلادهم ..»

ومن مواسم الحب لمصر لما يجي شهر اكتوبر ، واوعى
تقهمني صح و تقولى نصر اكتوبر و الجو القديم ده - لا خالص -
اكتوبر بتاع النصر ده بقه موضة قديمة جدا .

اكتوبر المقصود هو موسم التجنيد و حجم الهم و النكد والغم
اللى تشوفه على وش المجند اللى داخل الجيش هو وأهله « و-
ده علشان هو بيعب مصر أوى - و حجم السعادة للى اخد إعفاء
أو تأجيل ، أو هرب من الجيش ، و اتمنع من السفر و قدر يعمل
مصالحة و يدفع الغرامة قبل ما يتحبس، وأد ايه بيكون سعيد و
مرتاح جدا إنه مدخلش الجيش يخدم حبيبته مصر .

و لما تبص على الحب الغالى - لا الغالى اوى - الحب الذى
تھاوت من أجله ملايين الجنيھات تحت رجليكى يا مصر يا غاليه
يا حلوة.....!.....

هو حب المجلس، العضوية، الحصانة ، و مال مصر و مال
المجلس، ما هى مصر هى السبوبة المصلحة يعنى» اصرقك
تلات أربع ملايين جنيه و لازم صورك تكون فى كل مكان و على كل
باب و على كل حطة »

المهم تاخذ الحصانة وتدخل المجلس واوعى بقه.....!

يا حبيبتي يا مصر بجد ، عشره آلاف متر مبانى هنا ، على
ألف فدان هناك ، وقروض بالملايين و قرى سياحية و مشاريع
عملاقة، صفقات قمح و أرز ومكرونة منتهية الصلاحية تتورد
للتموين ،يعنى من الآخر كده العضوده اللى بالعافية بيحك الخط
ولو قرأ الجرنال يبقى يوم عيد ،

يدخل المجلس و يبدأ يخطط و يكتب قوانين و تشريعات لمصر
لمدة خمسين سنة و مفيش مانع أنه يتبنى مطرب أو مطربة و
يتعاقد مع قناة خاصة و يعمله كام لقاء تلفزيونى و كله مدفوع
مقدما عشان التلميع و الوجاهة،

و ده عشان الحب يبقى كده عالى ومسمع.

وبالنسبة للدائرة هايقول إيه» طظ مش أنا وصلت للمجلس و
خلاص محدش ينتخبنى تانى» ويا مين يعيش بعد أربع سنين هو
لسه حد فاكر .

و مصر هى البلد الوحيد اللى كل ما المصرى ارتفع فى

المناصب زاد حبه لبلده ، و كل الحب ده مفيش أى كلام يوصفه اد
إنجازات كل اللى مسك مكان فى مصر وعمل من وراه كام مليون لا
«هيقولوا عليا غلبانة» نقول كام مليار.

و عندى طلب بسيط من القائمين على مصر

«نكتفى بهذا القدر من الحب المزيف لمصر ، سيبوها تتقدم

شوية بحب المخلصين من أبنائها»

حب الحریم

الحريم يا سلام على الحريم

هن زهرة الدنيا والورد اللى مفتح فى كل بيت ، الجمال النظافة
الشاكة الذوق الابتسامة الرقيقة ، الجميلات ، القوارير ، ملهمات
الشعراء بطالات قصص الحب حلم الشباب ، ولهفة العشاق ، وهى
من يسهر الحبيب لها و يطوف بباب بيتها ، ومن يقتل نفسه إن
فارقتة ، و يعتق نسائه من أجلها ، ولا يوجد رجل على وجه الأرض
إلا ما وقع فى غرام بنت حوا ، وحبها ولا ينساها أبدا ، ويدق قلبه
كلما تذكرها و تذكر عطرها ، وإذا أسعده الحظ و تزوجها فهو فى
سعادة إلى آخر عمره ،

أما إذا كان كفالبيه الناس « شاف حمص و لا كلش فهو حب و

اتلوع و لا طالش ».

وبس كفاية كده دلع ؟

لأن هذه المخلوقة الرقيقة الجميلة العذبة تحولت إلى كائن قبيح ، يمكن شكله حلو من بره ، إنما من الداخل مضعم بالرجولة و الخشونة و الغلظة و القبح ،

فقد تحول قلبها الرقيق إلى صخرة صماء ملساء ،

وتحولت المرأة في مصر إلى كائن مادي فاقد لأي إحساس أو شعور ، متقمصة شخصية الرجل في كل تصرفاتها ، فأصبحت تفكر مثله وتلبس مثله ، أصبحت تتعامل مع الرجال بقسوة و شدة ،ومن يقع تحت يدها لا ترحمه ، وهذا ليس لأن الرجل فقد رجولته ؟! و أصبح ظاهرة حنجورية فقط ، بل لأنه هو تحول إلى هم فوق همومها و أصبح عبء على أعبائها .

و تجد إحدى النساء في جمال الأميرة ديانا ورقة وعذوبة فاتن حمامة و لكن عندما تتكلم معك تجد نفسك بتتكلم مع سواق عربية ميكروباص . تشتم و تتخانق و ممكن تضرب أي راجل عادي جدا .

ويعد البحث الجاد منى عن مصير الأنوثة في مصر وجدتها ،
و لكنها «معتقلة لحين دفع الكفالة » و مع الأسف لا أحد قادر
على إطلاق سراحها

و الحب أصبح غير وارد في قاموس المرأة المصرية ، وأصبحت
تضن بمشاعر العطف والحنان إن وجدت على أى رجل فتقول في
نفسها « خسارة فيه ».

و هى تتزوج بلا حب نهائيا ، ولا تتزوج إلا من انطبقت عليه
الشروط و المواصفات كاملة .

وهذه الشروط هى كالاتى :

أولا: الشباب و الفلوس والعرييات والذهب .

ثانيا : عاوزه الفستان الأبيض و الشقة و الرّفة و مهند التركى
ماشى جنبها .

ثالثا : عاوزه الحب و الشعر و الرومانسية و الرجل يكون أسير
حبها و عشقها ، يتغزل فى عيونها « حتى لو كانت معمصاة » لا يسرح
فى قوامها . حتى لو كانت برميل طرشى .

يخلل أصابعه بين خصل شعرها حتى و . لوكان ليفة سلك
مقطعة .

يقبل يديها حتى ولوكانت خشفة !

وقد أصحبت هذه المرأة لاهثة خلف الزواج المكتمل الشروط

بهدف «أنها تتجاوز أي حمار يصرف عليها و تتعلق في رقبته و
مايقولوش عنها عانس .»

و بمجرد إن اكتب كتابها تحولت إلى أبو دومة أو ممكن حنفي
الونش .

و بعد كده مفيش أي مشكلة تكمل متكملش المهم العقدة
اتفكت .

و ياسلام لما تخلف عيل ، أقول للراجل المصرى ريح نفسك
مهما تعمل هي خلاص نامت و حطت في بطنها بطيخة صيفى .

وفيه نوع من الستات وهي خطيره جدا فهي لا ترحم أبدا ،
و«هي المرأه الزومبى»، ومواصفاتها أنها لا ترتاح أبدا حتى تحول

جوزها من رجل غنى معاه فلوس إلى رجل مديوووووون أيوه ، و
تركز معاه جدا حتى يفلس تماما و يعيش فى هم و دين و عندما
تصل به إلى نقطة الفلس و الديون تهدأ و ترتاح !

وتكون النهاية درامية ، فممكّن إنه يتزوج عليها . بس صعب
عشان هو مديون و الجواز عاوز مصاريف كثير .

طيب ممكن يطلقها ! لكن الطلاق صعب عشان معاهوش يدفع
المؤخر !

فيضطر أسفا أن يعيش معها !

و يبدأ رحلة الانتقام من كل بنات حواء و ياويلها اللي تقع تحت
إيده .

و أحب أقولك أيتها « المرأة الزومبي » أنه أول فلوس هاتجيله
صدقينى لن تري منه خيرا أو شرا فمش هاتشوفيه تانى خالص
لأنه هايطفش منك .»

ومن نماذج الحريم عندنا فى مصر، المرأة التى تاخذ من
الدنيا أسوأ ما فيها ومن الناس أسوأ ما فيهم ، فهى المرأة التى

طلعت موضحة ، تعدد الأزواج ، أيوه ولا أبالغ فهي متجوزة اثنين
واحد شرعى والتانى عرقى ،

وغالبا الشرعى عجوز وغنى ، والعرقى شباب قوى ! و هى
مرتاحة جدا كده و محافظة على البرواز الاجتماعى وبرضو على
الفساد الأخلاقى .

و العجيب إنها بتحب الاثنين بنفس القوة و نفس اللفتة و نفس
الشوق ، و دى من أعراض التحول و تقمصها لشخصية الرجل
اللى بيتزوج اثنين ،

واحساسها بالمساواة معه ،

فهى فى داخلها بعد إن استطاعت بمفردها أن تشق طريقها فى
الحياة و تكسب فلوس ضاعت قيمة الرجل فى عينيها ، فأصبحت
هى فى داخلها راجل و لكن فى صورة واحدة ست .

و لي كلمة أقولها للراجل « لا تترك حبيبك تتحول ، خليها
أنثى لا تطالبها بكسب المال و لا تبخل عليها به فتبحث هى عنه
بمفردها ، و أنفق عليها بالعقل

فلا تضيع مالك لأنك إن ضيعته ستخسرهما ، ولا تحرمها من
حبك وحنانك حتى وإن كان هذا الحب مصطنعا و مزيفا فهي
تعطي كما تأخذ »

حب الروتين

العشق الهوى الإخلاص الامتناهى التفانى ، الحب القديم
الجديد ، ألا وهو حب المصريين للروتين و إبداعهم فى تعقيد
حياة بعضهم البعض ، و التناغم غير الطبيعى بين كل هيئات و
مؤسسات الدولة فى تطبيقه ، والقاسم المشترك بينهم فى إهدار
المال العام و تضییع الفرص و الوقت و قتل أحلام و طموحات
الناس بقضاء مصالحهم فى سهولة و يسر ، وهذا هو أكبر
تعبير عن حب العمل !

ومن العجيب أنك تجد فى كل المصالح الحكومية موظف
واحد بس هو اللى بيشتغل و الباقي قاعد بيتكلم فى الموبايل أو
بيقرأ الجرائد و يلفظ أو ييحب على روحه فى الموظفة الجديدة
الحلوة اللى لسه متعينه جديد.

أو ييجى يمضى و يمشى عشان عنده شغل فى حته تانية أو
مأمورية أو مزوغ عادى أوالموظف الحاضر الغائب النائم على
المكتب ، و لا اللى بتلم الجمعية عشان الدروس بتاعة الثانوية
العامة .

و قد أسعدنى زمانى وروحت أعمل توكيل لأحد المحامين
عشان عندي قضية ميراث وبدأت رحلة عمل التوكيل .

أول مرة ! أيوه أول مرة ، «ماهو أنا عملته على مرتين»

لما وصلت للمكان معرفتش أدخل المبنى أصلا من طول
الطابور ، إنما بالتصميم و الإرادة القوية والعزيمة تجاوزت هذا
الطابور ، ووصلت للموظف البطل اللى بيعمل لوحده كل حاجة .

المهم إنى وصلت له ،

قالى: نعم

رديت :عاوزه أعمل توكيل

قالى :خلاص خلصنا

قلت : الساعة كام دي لسه الساعة ١١ صباحا ١

قالى : خلاص العدد كمل ،

رديت : عدد إيه ؟

قالى : عدد البطايق اكتمل خلاص تعالى بكره .

ومشيت وأنا كلي إحباط ، إيه ده...؟ السلالم مزدحمة فوق الوصف ومحدث سامع أو شايف أى حاجة ، المكان ضيق ومظلم فهو شقة قديمة غرفتين و صالة ، بناء الخمسينات ، متهالك . دفاتره مكدسة ومتربة . مكاتبه قديمة بلاط أرضيته متكسرو كأن الدولة لا تتفق ربع الدمغات اللى بندفعها على صيانة المقرات اللى بتدخل ملايين الجنيهات من جيوب الناس.

ولا أحد تراه غير هذا الموظف البطل و كأن مفيش أى موظفين فى المكان يساعدوا الناس غيره ،

وأول إحساس يجيلك « هما مايبيعينوش ناس عشان تخدم المصريين ليه

ده احنا عندنا بطالة رهيبة » .

و فى اليوم الثانى صحيت بدري و طلبت من ربنا العون و
توجهت إلى هذا المكتب وبعد التدقيق فى البطاقة و التأكد من
تاريخ الانتهاء و هو من باب حب الروتين يعنى لوصلاحياتها انتهت
ممكن أروح عادى و لو مش تبع المنطقة برضو أروح
المهم إنه أخذ منى البطاقة و يال سعادتى الغامرة .

وقالى :استنى لما ننادى اسمك ،

و انتظرت و بدأت أكتشف حجم الحب الجارف لهذا المارد
المسمى بالروتين .

بعد أخذ البطاقة بالدور ندخل على موظف همام يبدأ يأخذ
البيانات و يسجلها على ورقة مطبوعة وطبعاً أنا أشتريتها من حد
فى الشارع عشان هما فوق معندهم شئ نسخ وبدأنا رحلة جديدة
وهى اللف على المكاتب اللى يمضى و اللى يختم و اللى يبص فى
البطاقة و اللى يسجل فى الدفتر و يمضيها .

و كل الطابور ماشى ورايا من مكتب لمكتب و انتابتنا نويات
الضحك من هزلية الصورة .

و عندما كنا ندخل أى مكتب نجد موظفين كثير قاعدين
مبيعملوش أى حاجة و الطابور بره طويل جدا لوده غير الناس اللى
مشيت علشان العدد اكتمل .


و هذا ليس فى الشهر العقارى وحده بل فى أماكن كتيره جدا
زى شئون الطلبة بالكليات الزحمة زى التجارة و الحقوق و على
أبواب مستشفيات الحكومة ،

حيث يطبق الروتين فى الدخول حتى و لو مات المريض ،
و من الملاحظ أنك لو أخرجت من جييك خمسين جنيه مثلا
ستنقطع علاقة الحب مع

الروتين فورا و تنقضى مصالحك فى غمضة عين و يتسب و
يتلعن أبو الروتين .

و أمامكم حل من اثنين (يا تخفضوا الروتين يا تشغلوا كل
الموظفين) .

حب الرغى



الحب الإرادى المندفـع المتهور ... يمكن أكثر حاجة بيحبها
المصريين الحلوين هى الكلام أى الرغى.

كله بيتكلم وقبل ما تقول إنت أقولك أنا .. أيوه الكلام هو حرفة
الستات فعندهم القدرة على الكلام بلا توقف لمدة ٢٤ ساعة مع
أى حد و فى أى مكان ، خاصة على الباب قبل ما يمشوا، وكان
الرجاله بتعيب على الستات بحبهم للرغى و يقولوا عليهم ستات
فاضيه بس ده كان زمان .

صباح الخير! فى يوم و ليلة أتغيرت الدنيا و طلعت علينا دول
العلم و التقدم باختراع يستحقوا عليه جوايز نوبل كلها و هو
الموبايل، وأصبح الرجاله بيتكلموا فى الموبايل أكثر من الستات

،والواحد فيهم معاه ثلاث موبايلات و فاتح ست خطوط و بي شحن
كل شهر يجيي كده بخمسة جنية أو أكثر، ده غير فواتير النت
و كمان منزلين كل تطبيقات الكلام المجاني زي واتس و فيبر و
ماسنجر و سكاي بي و كل ده و مش مكفى ! و طبعا من ساعة ما
يصحى الصبح لحد باليل و هو بيتكلم فى الموبايل أو مع الناس
فى الشغل أو مع المزة .

وأول ما يتحط المفتاح فى باب الشقة و يدخل بيته . سبحان
الله . تجيله الكتمة الكلامية و أنا الوحيدة اللى مقدره كتّمته لأنه
ببساطة خلص كل طاقة الكلام الموجودة عنده بره البيت و تم
استهلاك بطارية لسانه لحد لسانه ما قطع شحن .

و المكالمة الوحيدة اللى بيكلم فيها مراته ،وهو مروح نصها
كالآتى:

هو :أيوه يا ماما

هى : إنت هاتييجى امتى ؟

هو : هاتاخر

هى : طيب سلام

هو : فى داهية و لية نكدية .

و لما يوصل البيت أنا تعبان و مصدع اوى و عاوز

أنام !

،ولما هى تتضايق وتمل يطلع عليها بالأسطوانة المشروخة ،

ماهو كله عشانك و عشان عيالك !

لا وعشانك إنت فى الأول و فى الآخر يا بيبى ،

و لازم تقدر يا جماعة هذا الاحتباس الحرارى فى دماغه

من كتر السخونة التى تصدرها ذبذبات الموييلات و هو بيثبت

الحريم اللى معاه على التلفون .

والله مجهود يعنى لازم يصدع جداً ،

ومن المسلمات ان الموبايل هو اللى ممشى الدنيا ! بس ده عند

الناس الساذجة ،

إنما اللى ممشى الدنيا هو الإنترنت و العمل الجاد و مش

هانتكر فوايد الموبايل أنه بيسهل الأعمال بس مش لدرجة أن
يدفع المصريون حوالى ستة مليارات جنيه فواتير موبايل سنويا ،
يحد كثير لكن - هو ده الحب اللى مانقدرش نعيش من غيره ..

و من أجمل مواقف الموبايل « تلاقي حد صوته على جدا
لدرجة إنك تتصور إن فيه مشاجرة فى الشارع وبعد لحظة تلاقي
واحد بيتكلم فى الموبايل و بيصرخ » .

و انتشرت عدوى الرغي فى كل حاجة حتى أصبح الرغي
هو سمة العصر الحديث ومن أهم معالمه ، برامج الرغي التى
انتشرت على كل قنوات التلفزيون و تحول كل مذيع إلى دكتور
مشاعر و أحاسيس و الضيوف كلهم نجوم سينما ،

والأسئلة كلها كالاتي:

كان إحساسك إيه لما كنتى بتصورى فى رمضان عشر ساعات
؟ أكيد كنت تعبانة

كان شعورك إيه ليلة العيد و إنت لسه محميتش العيال ؟ أكيد
كنت متضايقه .

و احنا كمشاهدين شعرنا بقلق كبير عليكى اوى لما وقعتى و
انتى بتصورى آخر مشهد فى المسلسل!

اه، و انتى خسيتى اوى اوى و بقيتى مزه هههههههههه.

و أصبحوا كورقة وتحتها نسخ كربون و كل البرامج أصبحت
عبارة عن رغي و إعلانات و التقليد واضح و مفهوم.

الأصل هى أوبرا وينفري المذيعة الامريكية السمراء بس
هناك فرق بين أوبرا ونسخ الكربون.

أوبرا بتساعد فقراء و مرضى بلدها و بتفرق تبرعات و بتساعد
الولايات الامريكية المنكوبة أو اللي حصل فيها كوارث طبيعية ،
هى مذيعة إعلامية موهوبة وتعتبر مؤسسة كبيرة بجدة بتحب بلدها
مش بتحب الرغي و الطبخ و اللت و العجين فى كلام مكرر بلا أي
فائدة ، و من أحلى نسخ الكربون الباهتة خد عندك .

منى الشاذلى

معكم

مها أحمد

ربع ستة ستات

إسعاد يونس

صاحبة السعادة

وفاء الكيلانى

الحكم

سمر

سمر و الرجال

د مدحت العدل

أنت حر

محمد على خير

مساء الخير


أمير كراه

الخزنة

وأظن إن إحنافى مصر لازم نخفف شويه من حدة هذا الحب
المندفع للرغى ولا نضيع ساعات و إنتاج و هوا و تصوير و لبس و
مكياج و إعلانات و ناس رايحة و ناس جاية و كله عشان ممارسة
الرغى بقوة ،ومن الآخر نفسى أستفيد من برامج التلفزيون و
أتعلم حاجة جديدة منها ،

و نلاقى حد يحل مشكلة واحدة من مشاكلنا أو حد يتبنى قضية
واحدة و يوجد لها حلا .

حب الحياة



حياتك ملكك هبها لمن تشاء أو استأثر بها لذاتك ، فلا تهب
حياتك لمن لا يقدر قيمة الحياة ، ناهيك عن أنه لا يقدر قيمتك
أنت ، فلا تعطها إلا لمن يستحقها ، ويكون لك رصيда كبيرا من
المحبة فى قلبه حتى يحفظ هذه الهبة ولا يلقيها فى سلة مهملاته.

احنا الشعب المميز الجميل فى كل شئ ، ودى مش إعادة
لل كلام ، إنما هو تأكيد لهذه الحقيقة ، وحبنا كمصريين للحياة
واضح فى طريقة حياتنا ، فنحن شعب نحافظ على كل حاجة
نمتلكها لدرجة إنك تحس إننا مش عايشين فى بيوتنا و أن احنا
ماضيين على عهدة ولازم نسلمها .

ويمكن ده من تأثرنا بمقابر الفراعنة المكتشفة وما نجده فيها

من أواني ذهبية وأدوات كاملة تصلح للحياة الآخرة بعد الموت ، فأصبحنا عند الزواج نشترى كمية كبيرة من أطقم الصينى و الفخار وأنواع أخرى كثيرة من الأواني ، و تكس هذه الأدوات فى قطعة موبيليا تسمى النيش ، وهذا النيش هو خط أحمر ممنوع الاقتراب منه أو التصوير.

وليه.....§

فهذا هو أحد مظاهر حب الحياة ، فيظل المصريون يأكلون فى أطباق بلاستيك طول حياتهم حتى الوفاة ، ويتركون هذا النيش بما فيه كما هو جديد ، ويحتمل أنه فقد بعض القطع التى لا تتعدى عدد أصابع اليد الواحدة ولا يحدث هذا إلا فى مناسبات إجبارية كوجود أشخاص أعلى فى المستوى ، فنلجأ إلى مخزن الصينى حتى نستعرض إمكانياتنا المادية القيمة أمامه.

و لازم و ضرورى يكون هناك غرفة مغلقة للضيوف لا تفتح لأهل البيت أنفسهم و تظل مغلقة أياما و سبينا حتى يأتى هذا الضيف المنتظر الذى تفتح له .

و امتد المرض للملابس فأصبح المصريون يشترون الملابس

ويتركونها جديدة للمناسبات المهمة ، ويسمونها «اللى على الحبل» ويعيشوا حياتهم بنفس الملابس المتكررة القديمة حتى تضيق الجديدة وتنتهى موضتها ويصغر مقاسها وهى جديدة ، كما أنهم يشترون ملابس أطفالهم أكبر فى القياس بحجة أن الاطفال يكبرون سريعا وفى هذه الحالة يكون شكل الطفل وهو لابس ملابسه الجديدة وكأنها قديمة وأخذها من أخيه الأكبر، وعندما يكبر ويوصل للمقاس تكون أصبحت قديمة وبالية ... ففى الحالتين سيكون شكله زى الشحاتين!.

و من فرط حبنا للحياة . ابتكرنا فى الانتحار

، فانتحر الشباب والبنات حرقا ببواجير الجاز، وغرقا فى النيل ، وشنقا على أعمدة الكهرباء .

و بلغ كميات كبيرة من الأدوية ، و من أعجب ابتكارات الانتحار نزول المظاهرات أملا فى رصاصة طائشة أو قيادة سيارة بدون تعليم رغبة بحدوث حادثة ، وهناك من يبحث على فتوى تلتمس عذرا للمنتحر حتى لا يعتبر كافر وده من فرط حب الحياة بداخلنا.....!.

و فى بلاد الدنيا كلها لما الناس بتحب تخرج تنفسح هى و أولادها - بيخرجوا إلى المتنزهات المفتوحة مجاناً . انما علشان احنا مختلفين لما نحب ننتزه أو أولادنا يلعبوا شوية رياضة ونجلس فى مكان نظيف لا يوجد أمامنا إلا المشروع الاستثماري الكبير المسمى بالنوادي الرياضية مثل نادى الصيد أو النادى الاهلى أو وادى دجلة ، والاشترك يعنى يعملوا كده تقريبا ثمانين ألف جنيه و يزيد ، وهناك بعض النوادي قفلت العضوية خلاص ... لان العدد اكتمل .

و هذه الاشتراكات تتم من باب الوجاهة الاجتماعية وليس حبا للحياة أو حبا للرياضة مثلا ! بدليل أنك عندما تدخل هذه النوادي تجد الناس قاعدة على الكراسى و كأنهم تماثيل شمع فى صالة عرض ، و كلهم قاعدين بمنتهى الوقار والهيبة والاحترام .

و فيه شعوب أبهرتني بحبها للحياة ونفسى نتعلم منهم شوية من حبهم للحياة فهم عكسنا فى كل شئ ، يلبسون أجمل الثياب يأكلون أشهى الأكلات يسافرون للمتعة حتى داخل بلدهم ، يرقصون معا الدبكة وهم جماعات عرفوا قيمة الحياة وظهر فيهم

معمرون عدوا المائة عام رى الشحرورة صباح ونشروا ثقافة حب الحياة بين الشعوب العربية ، ونسبة الانتحار عندهم صفر وهم أبناء لبنان فى حين إحنا المصريين فى أربعة أشهر فقط وصل عدد المنتحرين الى ستين شخص و ده شئ خطير.....!

لماذا نكره الحياة ؟ سؤال يطرح نفسه ؟

الجواب باختصار... لموت الحب فى قلوب الكثير منا فانتشرت الكراهية بين الناس حتى المقربين منهم وتحكم قساة القلوب فى مفاصل حياتنا ، ففقدنا الأمل و طغى علينا اليأس فى العيش بسعادة ، ففضلنا الموت على الحياة علنا نجد فيه السعادة المنشودة.

و لوأنه من السهل أن تتحقق بسهولة إذا تنازل القساة بعض الشئ عن قسوتهم و مدوا جسور المحبة بين الناس قولاً و فعلاً ، وانتشرت ثقافة الرحمة بين الناس وأخذنا بأسباب المحبة و أبسطها الهدية .

فالهديا البسيطة ترقى القلوب وتقرب المسافات بين الناس وتبنى جسور المحبة المحطمة طبقاً لقول النبى (صلى الله عليه

وسلم) تهادوا تحابوا.

والعرفان بالجميل ورده قدر المستطاع و لو بكلمات الشكر
البسيطة و إدخال السعادة والسرور على بعضنا البعض وفي
النهاية .

سنندم على كل يوم ضاع في نشر الكراهية و البغضاء بيننا
عندما يمر بنا العمر و نجد أنفسنا نعاني وحدة قاسية ، ويتفرض
الأهل و الأحباب من حولنا و لا نجنى إلا حصاد ما زرعت نفوسنا
المريضة .

الحب المستورد

وبعد هذا الكم الهائل من اليأس والإحباط الذى تعيشه المرأة المصرية وهى تسطر أروع قصص البطولة والفداء فى الزواج ، من حيث التضحية بكل شئ جميل والصبر على الممار الطافح مع هذا الكائن المسمى الرجل المصرى ونسيان ما مضى من قصص حب فاشلة و تجارب مؤلمة عاشتها و ذلك لأن الذى أحبه و فشلت فى حبها الاول معاه مصرى أو الذى تزوجته و ماتت احلامها معاه يرضو مصرى .

ولكن الفرق أن الذى تزوجته هو راجل أتهد وتعب من كثر الشقاوة و اللعب بينات حوا و تحطيم قلوب العذارى وقرر إنه يتجاوز و يلحق آخر عربة فى قطار الزواج و يلحق يخلقه حته عيل قبل ما يكبر ويترك على الرف أو يأخذ منه الزمان أغلى ما يملك الا وهو

شعر رأسه و يتركه بلا شعر فيزداد جمالا على جماله و حسنا على
حسنه الفتاك.....!

وفجأة وبدون سابق إنذار دخل علينا الحب المستورد وبما أننا
شعب لا يثق إلا فى المستورد وعندنا عقدة الخوافة وتخلفنا فى
كل شئ عن دول العالم خلانا نتجذب لهذا الحب المستورد كما
«تجذب الفراشة للنار وهى لا تشعر إلا بحلاوة الدفئ ولا تعلم
أنها ستحترق» .

فقد حدث زلزال فى كيان المرأة المصرية ، وليست المصرية
فقط ، إنما وصلت توابع هذا الزلزال التركي إلى نساء الدول
العربية.

وبدأت التساؤلات تكثر ما هذا الذى نشاهده، فكل شئ عندهم
جميل ، الشعب كله ستات ورجالة حلوين اوى وبالتحديد «مهند»!
البلد جميلة جدا ونظيفة جدا ولا يوجد عندهم زبالة مادية أو
اخلاقية .

وما هذا الأدب و الذوق الرفيع ، لا وايه مسلمين يعنى مثلنا ، و

لكن ليه عندهم كل حاجة حلوة ، اه يمكن عشان مش عرب. جايز.
والاكيد عشان مش مصريين ؟

و بدأت المرأة المصرية تتابع وتتابع المسلسلات التركي بدون
كلل أو ملل أو حتى انتقاد و بدأت الأحاديث بين النساء تدور حول
جمال ورقة الإحساس الذى يتمتع به أبطال المسلسلات التركي.

و بدأ صاحبنا سبع الرجال بطل الأبطال الرجل المصرى
تجيله صدمة و يقول فى نفسه «إيه ده يا نهار أسود ، كده هيجصل
تمرد علينا و لازم نعمل أى حاجة »

و أول حاجة طلعت هى صدور فتاوى بأن مشاهدة المسلسلات
التركية لا تجوز.

و لم تأخذ الستات بالفتوى - عادى - لأنها مسيسة زى فتاوى
كثير تصدر بأوامر سياسية !

فقالوا عيب مشاهدة هذه المسلسلات . و لكن لا حياة لمن
تنادي . وأخذ الرجالة المصريين بالتشكيك فى رجولة الرجل
التركي ، يعنى يقول : إيه الرجالة دى ؟ ده مش رجاله أصلا .

دول ييجيوا ورد وخواتم الماظ

...! عالم سيس .

و لكن حدثت الأزمة وانطلقت رصاصة المقارنة فى عيون المرأة المصرية بين الرجل المصرى وهذا التركى الذى تنتظره بالساعات وتغير مواعيدها مع مواعيد عرض مسلسله و ممكن تلغي هذه المواعيد - عادى - إذا لم تكن ضرورية وده لحضور ومتابعة الحلقة مباشرة.

وإن فافتها تشاهدها على الإنترنت معندهاش أي مشكلة وأصبحت الأحاديث النسائية كلها تدور فيها تساؤلات عن النجم فلان الفلانى «مهند» هو شكله كده طبيعى؟ ولا ده مكياج؟ وانتى بتحبيه ولا لا؟

و تردوا جده ثانية تقول: أدفع نص عمري وأتجوزه أسبوع .

و نسمع أن إحدى المطربات المشهورات استعانت به كموديل فى تصوير أغنييتها الجديدة .

وأصبحنا فنانز لهم على صفحاتهم الشخصية على الإنترنت ،

واتعلمنا شوية كلمات تركي ، و الجميلة فينا دائما تقول « أنا أصلا
جدودي أترك » .

و ظهرت لغة جديدة لم تكن نعهد لها من قبل ، وبدأنا نسمعها
أثناء الخناقات الزوجية

ألا وهى : أنت فاكر نفسك مين؟ هه ده فاكر نفسه مهند!

و بدأت ردة الفعل على المجتمع الذكورى المصرى ، فانقسم
هذا المجتمع إلى نصفين

النصف الأول: عرف قدر نفسه وأدرك أن فرصته فى المقاومة
معدومة لضعف إمكانياته ، فلم نفسه وقال : « اتعدل ياواد وعيش
وربي عيالك» و تنازل بعض الشئ عن كبريائه و بدأ يجيب هدايا ،
ويبتكرها فى عيد الحب بقلب أحمر مليان هواء ، أو زجاجة برفان،
أو هدية فضة أو ذهب صينى علشان الذهب المصرى ارتفع سعره
، و أخيرا طلع منه كلمتين حلوين على كارت صغير مع الهدية ولو
إنها عارفة إنه كذاب ... بس ماشى ، وأصبح ممكن يعزّمها على
حمص الشام على كوبرى قصر النيل وده كويس جدا ، اعتبره
تطور فى العلاقة العاطفية ، وبدأ ينصرها على حماتها وإخواته

البنات حتى تشعر بالسعادة و ترضى عنه و تتوقف عن المقارنة
بينه و بين «هذا المهند»

و إحنا الستات المصريات شعرنا بهذا التغير فى المعاملة فى
الآونة الأخيرة .

ده بالنسبة للمتجوز، أما اللي خاطب أو ييحب ده ركز مع
الأترك وبدأ يقلد فوري، يعنى بييجيب ورد و هدايا و كلامه كله حلو
دائماً وعلى طول معاها فى أزماتها و مشاويرها ، يعنى تنازل عن
الغرور و التعالي و مشى على الأرض .

و أنا عن نفسى بشجع هذا الجيل.

وبقول له « أنتم شباب واع متمتع بالذكاء لأنكم لا تقلدون فشل
آبائكم وأجدادكم المصريين الذكور وسوف تعيشون سعداء بإذن
الله » .

أما الجيل المتحجر : فهو هذا الجيل العنيد المكابر وفى
الغالب يكون خمسينى العمر، وهذا الجيل لم يأخذ من الدنيا إلا
أسوأ ما فيها، فهو هذا الجيل الالهث خلف المال، كل شئ عنده

مباح في سبيل الوصول لهدفه ، وطبعاً الكثير منهم وصل ولكن على حطام الآخرين ، وهذا الجيل لا يسمع لآراء الشباب أو يتعلم منهم أى شئ ، ودائماً ما يقول عنهم دى عيال فاشلة و تافهة وفى نظره الفشل هو عدم القدرة على عمل فلوس ، ولا فائدة من هذا الجيل ولأن هذا العناد جاء من تحقيقه لبعض النجاحات ، ولكنها كلها على المستوى الشخصي لا على المستوى المجتمعي ، يعني كلها بتصب فى حسابه البنكي .

وحبه فى الحياة ينصب على أسعار الشقق والعملات و البنزين وما دون ذلك ليس فى نطاق دائرة اهتماماته ، و مش فالح فى حاجة غير السخرية من الستات فى كل شئ ، فى شغلها يقولها إنتى ايه اللى مشغلك ، خليكى فى بيتك وربى عيالك ، ولما تركب عربيتها يرخم عليها و هى سايقة ويقولها «مين الحمار اللى ركبها لك» ، و مفيش أى حاجة أو حد عاجبه ،

و ياريت هذا الجيل ترك أى بصمة فلا هو دخل حرب وانتصر مثلاً أو اشتغل و طور البلد ،

إنما لا تأخذ منه إلا التنظير وتسفيه الاحلام.....

وحلاقة الدفن وبس .

وهولن يتغير فيه شئ لا بالمسلسلات التركي ولا حتى بالقنابل
المكسيكي، فلا أمل فيه ويستاهل كل اللي بيحصله من الستات
الزومبيز .

حب الحرية

العصفور على الشجرة يغرد يطير كل ساعة يحلق فى السماء
يرفرف بجناحيه يتنقل من شجرة لشجرة سعيدا بحريته ، و من
يستطيع أن يمسك بهذا العصفور ؟
الجواب لا أحد .

و لكن ماذا سيحدث إن ترك هذا العصفور الشجرة وتنازل
طواعية وعن طيب خاطر عن حريته و حط بجناحيه عندك ليغرد
لك ليل نهار و يسعدك بصوته و يملأ أيامك كلها بالحياة .

أليس هذا أفضل من أن تأتى به و تحبسه داخل قضبان
القفص وتغلق عليه بأقفال السجان و تحرمه من التفريد وتفتح
باب السجن كل يوم لتضع له الماء و الحبوب وتحكم عليه بالسجن

المؤبد و تحرمه من الطيران نهائيا طول عمره

ويموت فية الأمل أنه فى يوم من الأيام يبنى عش لحبيبته.

و ممكن أن تنساه فيموت جوعا ، وفى الغالب أنه يموت حزنا على حرите المسلوية و أيامه الطويلة خلف قضبان القفص بلا أى ذنب اقترفه غير أنه له صوت جميل و ريش خلاب وهو محب للحياة و له رأى فيما يحدث حوله، أى ذنب كبير ترتكبه فى حق هذا المخلوق.

ولعلمك هو لن يأتيك أبدا إلا فى حالة واحدة ألا وهى محبة طاغية لك تتبع من جنابات قلبه تجعله يأتيك سعيدا متناسيا حرите المسلوية.

و لم أجد بيتا مصرية إلا و اقتنى قمص عصافير - ويقولوا زينة - فحب القيود والأغلال هى صناعة مصرية ، وهذه الأغلال صنعناها نحن بأيدينا و كبلنا أنفسنا بها حتى ضاقت علينا الدنيا و ضاقت نفوسنا من كثرة القيود .

وهذه القيود سيريالية ارتجالية وضعت لخدمة أهداف واضعها

، فتجد الرجل في بيته وعمله له قوانينه وقيوده حسب مصلحته -
يعنى تفصيل - ففي بيته له قوانين ”تلاقى اللي مراته بتشتغل،
القيود علي الخروج مرفوعة، المهم إن المرتب يتحط في البيت .
واللي مسافر بيتابع بالتليفون ، وأهم حاجة عنده إنها ترد عليه .
وفيه ناس تانية كل حياتها قيود ،

والستات في مصرأتربت على أنها تمشي حسب القيود
الموضوعة بس كل الحكاية إن القيود في بيت والدها مختلفة عن
القيود في بيت جوزها .

وفي نفس الوقت هي كمان عملت علي جوزها قيود فحاولت
تمنعه من الخروج مع أصحابه وتخليه يروح البيت بدري ،

بس للأسف فشلت الفشل الذريع في تنفيذها .

و لجأت إلى وسائل مساعدة لملاحقة هذا العصفور الطليق
الحر .

فتجدها بتكلم جوزها في الموبايل حوالى مئة مرة في اليوم
حتى تخنقه ويضطر يقفله ،

وتتقمص الزوجة شخصية «المفتش كروميو» وتحاول تفك
شفرة الباس وورد الخاصة بحسابه على الفيس بوك و تعمل
حساب جديد باسم مستعار و ترسله كلام حب وغرام عسى أن
يتجاوب معها و تعرف إنه خاين.

وأخرى تشتري شريحة موبايل وتعاكس جوزها على إنها إحدى
المعجيات به.

ولكن الرجل المصرى المعلم هو كمان جننها ، عملها قفل على
موبايله و يفصل النت من على الموبايل قبل ما يروح البيت و ما
يبردش على اي أرقام غريبة ، وباس ورد حسابيه على الفيس بوك
عبارة عن معادلة جبرية من الدرجة الثانية يصعب على أساتذة
الرياضة حلها ، ودائما يتفاخر بأن موبايله خط أحمر.

و المهم أنه يصور لها إنه راجل ملتزم محترم ومعتد هوش
الكلام الفارغ ده ، وأنه ماشى على القيود الموضوعة تمام
ويحافظ عليها أكثر منها هى شخصيا ،

و لكن الحقيقة .هو عصفور حرم فرد على الشجرة ، بيرد على
المائة مكاملة

ويقول بكل بساطة : أنا فى الشغل يا حبيبتي والحقيقة إنه فى مكان تانى خالص ، و الأجل لما يقول اقفلى و هاكلحك تانى.....
.....!

و يا سلام على التليفون و هو معلق ساعة ساعتين أو خارج نطاق التغطية و فى الغالب بعد الصراخ منها لما يفتح التليفون .

بيكون الرد القاتل الذى ليس له أي مقاومة أو فرصة للاعتراض
الا وهو :التليفون قطع شحن و الشبكة كانت واقعة.

لا .دى الشبكة كانت واقعة فى حيك يا معلم .-

يعنى لا مفر لهذه السجانة الفاشلة من الاستسلام التام فلا أمل فى تقييد هذا العصفور مهما حاولت .

و تحولت الحرية إلى عبء ثقيل فأصبحنا عندما نغضب على أحد ،

نقول له « اعمل اللى إنت عاوزه أنت حر » و كأنك عندما تكون بلا قيود و حر فأنت ضائع منحرف خرجت عن الدين وعن العرف و الأخلاق، و كل هذه الأحكام فقط لأنك كسرت القيود الشخصية

وبعد كل واحد وواحدة فينا كمصريين ما تخيل وصدق إنه حر
بالحيل و المؤامرات الفاشلة المعمولة من كل طرف على الطرف
الآخر.

أحب أقولكم : « إن ما حصلتم عليه من حرية هي حرية مزيفة
فأنتم كمن يلعب في ساحة سجن جدرانها من زجاج شفاف
تتخبطون فيها ، و أنتم لا تشعرون ، وتدورون في فلك مرسوم لكم
ممن هو أكبر منكم جميعا » ،

و بعد أن أشجعتكم يا مصريين و حطمتوا كل القيود و الأغلال
العتيقة التي امتلأت صداً و أجمعتم في مكان واحد» ميدان
التحرير» و صرختم بأعلى أصواتكم حتى بحت أصواتكم تطالبون
بالحرية ، وعندما ألتكم منقوصة فرحتم ورقصتم ظلناً منكم أنكم
قد نلتوها ، فتركوكم حتى ذهبت عنكم حرارة لقاء الحرية وانتهت
نشوة العناق بينكم وبينها ، وظننتم أنه لا سجانين بعد اليوم
وتخيلتم أن كل العصافير حطمت قضبان الأقفاص وحلقت بين
غصون الأشجار و سوف نفرد جميعا ، و فجأة وبلا سابق إنذار !

وصحينا من الحلم واكتشفنا أننا كلنا كنا بتحلم حلم واحد في
نفس الوقت و بنفس الكيفية وفي نفس المكان وأتينا نحن فقط من
نرفض أن نضع في بيوتنا أقفاص عصافير من فرط حبنا للحرية
وأن من يعيشون معنا أتونا عن طيب خاطر ولا يوجد بيننا وبينهم
قيود أو أغلال»

و اكتشفنا ان للحرية مفهوما آخر:

«الآ وهو » أنت حر داخل القفص تأكل و تشرب و تنام وانا
بالخارج حتى تشعر بالأمان و أنت مقفول عليك بالأغلال والأقفال،
وعيونى تراقبك و تتسمع لكلامك ،

و لاتحلم مرة أخرى بحريتك و إلا فقدت الأمان و الطعام و
الشراب و المأوى

وعش داخل القفص سعيدا مطيعا محبا للحرية كما أريدها
أنا و ليس كما تريدها أنت ... و هكذا علمتنا التجربة من الواقع
المفروض علينا جبرا -

متفرقات

عاطفية

متناقضة


الأخوة
الأحباب

من أكبر متناقضات الحب فى مجتمعنا المصرى هو حب الإخوة، تراهم فى حالة تناغم عاطفى و شوق غير طبيعى و زيارات مستمرة و يتصلوا دائما ببعضهم البعض و يتجمعوا عند الأم و الأب أيام الجمع و الأجازات الرسمية يسافروا المصايف سوا يقوموا بكل المجاملات الاجتماعية المفروضة و يتجمعوا لنصرة أختهم الضعيفة أمام جوزها ابن و الخناقات و المشاكل معه لا تتوقف حتى يتعدل هذا الزوج المتعب ، و ياسلام لو حد فيهم تعب أو عمل عملية أو احتاج لفلوس يلاقى اخواته حبايبه حاضرين جنبه . تنفذكروا ان ده حب حقيقى ولا حب مزيف .

وفجأة و بلا أي مقدمات وبمجرد وفاة الأب والأم تتحول الدنيا

البمبى بمبى إلى صواعق و براكين وحمم أخوية ، وذلك بسبب الميراث، ونسمع صراخ الأخت المسكينة التى كانوا يتخانقوا من أجلها بالأمس وهى تطالب بحقها فى الميراث و احيانا بتنضرب لتتنازل عن ميراثها وبالنسبة للإخوة الرجال فلا مانع من علة سخنة و تهم متبادلة بسرقة الأموال النقدية الموجودة «فى درج الدولار ساعة ابونا ما مات » ، و شتايم من كل الأنواع وكل الذكريات السوداء التى حدثت فى الطفولة تبان وتسترجع، وفى لحظة ينقسم الإخوة إلى أحزاب و يصل الأمر إلى خطف الأبناء ، وينسى الإخوة كل مشاعر الحب السابقة و ذلك لأنها كانت مزيفة من الاصل و الدليل أنها تحولت إلى مشاعر كراهية و عدااء ، و كل هذا من أجل الميراث .

حب الراقصات



كل الرجال المصريين بلا إستثناء يحبوا الرقص الشرقي، وذلك لأنه صنع فى مصر وهو فخر إنتاجنا و يشوفوا كل الراقصات وعارفين الفرق بين كل راقصة و أخرى ، والواحد فيهم يعتبر نفسه خبير تحكيم دولي فى الحكم عليها ! إذا كانت موزة و جامدة و لا بكرش وقايمة من على حلة المحشي على بدلة الرقص، وعارفين أساميهم واحدة واحدة و أكيد بلد المنشأ ، يعنى دي روسية و الثانية إيطالية والثالثة مصرية اصيلة ، وكلهم بيطلبوا من زوجاتهم ان يرقصن لهم، ولكن يا خيبة الأمل ولأنه دائما ما تعجز الزوجة المصرية عن تقديم هذا العرض الراقص نظرا للكرش المدلل و التخن الزائد و التكد الأسرى اللى بداعي و بدون داعى ،

وللتناقض تجد هذا الرجل المصرى المحب للرقص و الدلع
و المتابع الجيد على النت لأحدث الألبومات الراقصة ، إذا شاف
بنته أو مراته بترقص فى الصالة أو أمام صديقاتها يتحول فى
لحظة إلى واحد تانى من عرفهوش .

طيب أنت عاوز إيه ؟ بتتفرج عليهم وتشتم فيهم ، بتحب
مراتك أو حبيبك ترقصك بس الرقص عيب و حرام ، اثبت على
رأى إما إنك تتفرج عليهم و لا تشتم فيهم أو لا تتفرج خالص و
تشتم براحتك .

حب التجار



هم أكبر جماعة في مصر بينهم صفات مشتركة ، فهم - من أول السباك لحد طبيب العيون - ببساطة : هما كل من قام بمشروع تجارى للربح ، فمثلا مكتب محامى ، عيادة دكتور ، تاجر العجول - ملوك البناء و التعمير ، ألا وهم المقاولين ، أصحاب الهايبر ماركت ، ورجال مافيا تجارة السيارات جديد و قديم .

و حكاية الحب عند التجار مع الحريم مختلفة، فهم ماشيين بمبدأ أغلبها بالمال ومش مهم هات سبعة أو ثمانية عيال، وفى الغالب لازم يكملوا العدد و يوصلوا لأربعة زوجات ، ولازم تكون واحدة من زوجاته هى من منافساته فى السوق و لا يهدأ حتى تدخل فى عصمته هى و تجارتها وفلوسها ،

إنما عندهم حب من نوع مختلف، ألا وهو كسب المال، و
اللعب بالسوق ففي البداية يخفضوا السعر و يصبروا مدة زمنية
، مثلا سنة ، حتى تتم الشهرة وبعد كده اضرب السعر فى عشرة
أمثاله ، حتى ده بيحصل فى أنبل المهن، زى الطب أول ما يفتح
الدكتور عيادة تكون أسعار الفيزيتا منخفضة، ولكن بعد سنة
تنضرب الفيزيتا فى عشرة أضعاف لما يتشهر، ويا سلام لما
يفتح مستشفى استثماري ويتحول إلى رجل أعمال، والمهم نكسب
ونكسب كثير ومش مهم الناس يتخرب بيوتها أو تموت على أرصفة
المستشفيات ،

ولكن الشعب المصرى عرف يبادل هؤلاء التجار حبا بحب،
فامتنع عن الشراء وعاقبهم بانتشار الكساد ، و فاصلهم فى
الأسعار لحد ما أرهقهم ولف الدنيا حتى يحصل على نفس المنتج
، ولكن بسعر أقل ، وعمل اشتركات طبية قنوية وهكذا حتى انتصر
الشعب على التجار .

حب الإنترنت

إدمان هي الكلمة التي تعبر عند قدر الانجذاب العاطفي بين المصريين و الإنترنت ، فأصبح النت وبخاصة الفيس بوك هو محور حياة المصريين فهم لا يضيعون لحظة إلا و يتابعون حساباتهم الشخصية وحسابات أصدقائهم على الفيس بوك، و ياريت توقف الأمر عند المتابعة ، إنما تعدى إلى نشر كل تفاصيل حياتهم الشخصية على الفيس بوك أولا بأول فلا يفوتون أي مناسبة إلا و يكون النت قاسما مشتركا لهذه المناسبة، يعنى جواز طلاق ظهور وفاة ولادة، كله على النت ، ناهيك عن نقل الأحاسيس العاطفية إلى النت أولا بأول ، فمثلا أنا الآن أشعر بالحب أو أنا مريض أو أنا حاسس بإحباط أو أشعر بالوحدة والملل ، وإذا خرج أى حد من البيت يكتب فوراً أنه فى المكان القلانى مع تحديد إحداثيات


الموقع على الخريطة. حتى تظن أنه عميل شبكة مخبرات و يجب
أن يحدد مكانه باستمرار للمتابعة ! ال يعنى هو الواد مهم و خطير
و الدنيا هاتخرب لو معفناش هو فمين !

وده طبعاً علشان نعرف إنه بيتفسح و بيسافر و احنا قاعدين
فى البيت بنعانى من الملل ، يعنى ببساطة عاوز يغيظ أصحابه
عالفيسو عجبى !

و لم يتبق سوى أننا نكتب على الفيس (أنا الآن فى الحمام) ،
و تعدى نشر ما يحدث إلى أكثر من ذلك ، فقد وصل الهبل إلى
افتعال أحداث لنشرها على النت ، وتجد الشباب و البنات يخرجوا
من البيت و يتجمعوا فى أي مكان عام فقط لالتقاط الصور
ونشرها على الفيس بوك و كمان بيتعمل حفلات وسهرات للنشر
فقط ، وبالرغم من كل هذه السلبيات إلا أنه حدثت إيجابيات
عاطفية مثل: إن كل بنت بتتخطب أو تتزوج تنشر الصور فوراً على
الفيس ، والنتيجة هي أن صديقاتها تموت من الغيرة لأنها سبقتهم
و خرجت من طايور العانسات وانتقلت إلى صفوف المتزوجات ،
و من أجمل قصص النت أن الشاب اتعرف على بنت من ع النت
ووقع فى غرامها و عندما طلب منها موعد غرامي وجد أنها شاب

وهو أحد أصدقائه ، و النتيجة ان الشباب بداوا يأخذوا حذرهم و يطلب من البنت ، انها لازم تفتح الكاميرا فى بداية العلاقة حتى يكتشف شخصيتها الحقيقية ، قبل الوقوع فى المحذور.

حب العيال



كلنا بعد الجواز بنحب أوي أن يكون عندنا أولاد ، ومن ينجب بسهولة يسعد بعيش التجربة بلا جهد أو تعب .

أما من يتأخر عليه الحصول على هذا الابن فيبدأ فى رحلة الكفاح من أجل الحصول على ابن و بخاصة الستات ، لا تترك طريقا إلا و تمشي فيه من اللف و الدوران على كل الدكاترة و الممرضات وأخذ كل الادوية و عمل عمليات لا حصر لها حتى و إن كانت خطيرة جدا ، حتى تحدث المعجزة و تنجب هذا الطفل المنتظر ومشاعر الحب الفياضة والكبيرة جدا تبدأ و تنتهى فى مدة لا تتجاوز (تسعة وثمانين) يوما فقط بعد الولادة ، لانه فى اليوم التسعين يترك هذا الوليد الضعيف فى أي حضانة من الساعة السادسة صباحا و حتى الرابعة عصرا ، وأحيانا حتى

السادسة مساء - عادى جدا - بلا ام أو أب و يبقى مع أي مشرفة
لا تقدر حجم مشاعر الحب القوية التي أتت به لها .

و يعيش هذا الطفل و ينتقل من حضانة إلى حضانة أخرى وبعد
اكتشاف الام للإهمال الشديد الذي يتعرض له حبيبها الصغير،
فتغير الحضانة إلى حضانة أخرى - عادى جدا - وده أقصى ما
تقوم به، إنما لا تفرط يوما فالحب الحقيقي وهو المرتب أو أجر
أجازة الوضع . أو انها تأخذ أجازة عدة سنوات حتى يكبر،

والمستحيل بعينه أن تتنازل عن حبها العميق وهو(الجنيه) من
أجل هذا الضعيف الذي يكون في أشد الحاجة لها .

و يتحمل المصريون هذه الفترة الصعبة حتى يدخل هذا
الطفل إلى المدرسة ، ويبدأ حب من نوع جديد! وهو حب الدروس
الخصوصية من أول أقول ابتدائي و في كل المواد و لا فرق بين
الام العاملة أو ربة البيت فكله شغال على الدروس و يفضل كده
لحد ما يدخل الجامعة ، و في الجامعة لا تنتهى دوامة الدروس
ببساطة لأنه خلاص اتعود عليها .


و ينتهى به المطاف إلى إنسان قاشل و معقدهو و أبوه لأنهما

في هذه اللحظة أصبحا هما الـاتين مفلسين تماماً.

«الـين مفلس تعليمياً و الأـب مفلس مادياً»

و بـشـم في هذه الأمهات رائحة المرأة الزومبي بقوة.

حب الضباط



أبو الشريط الأحمر طالب الكلية العسكرية ساحر قلوب البنات
وخاصة عندما يخرج يوم الخميس من كليته العسكرية وهو حامل
الشنطة المربعة و لابس الكاب و ماشى فى الشارع، فتلاحقه
نظرات الفتيات بإعجاب و يحب بلا أي كسوف ، فهو فتى الأحلام
الفارس أبو حصان أسود ، فبجمالهِ ورشاقته وقوته الظاهرة ترفع
له الرايات البيضاء مقدما أملا فى نظرة أو ابتسامة من صاحب
هذا الشريط الأحمر، وبخاصة أنه عندما دخل الكلية أخذ شهادة
الجودة بعد تجاوزه للكشف الطبى وكشف الهيئة و من الناحية
المادية ، فمن المعروف لنا جميعا أن دخول هذه الكليات محتاج
رشوة كبيرة ، يعنى كمان معاه فلوس ومريش ،

ولا يقتصر الأمر على الفتيات ، إنما تنهافت البيوت العريقة

فى مصر على نيل شرف انضمام هذا الفارس لها و تدفع له المهور
وتشتري له الشقق فى سبيل نيل شرف النسب الغالى ،

و يال كم الغرور والكبر الذى يصاب به هذا المراهق الصغير ،

و هذا الحب لطالب الكلية تطور تطورا كبيرا جدا إلى أن أصبح
ارتباطا عاطفيا طويلا على مدار السنين .

و يظهر فى كل من يتقدم لحكم مصر ، فالحب يظهر واضح
فلا يسمح المصريون لغير الضباط بحكم بلدهم ، و تبدأ النساء
فى مغازلة هذا الضابط الحاكم خاصه إذا كان وسيما و رياضيا ،
و تمنح الثقة له بلا أى شئ قدمه لكسب هذه الثقة ، و وصل الأمر بنا
إلى أن رقصت نساء مصر بالشوارع و جلبت العار لمصر حبا لهذا
الضابط الحاكم ،! و الغريب أن رجالتهم وافقوا على هذا الرقص !


و يحرق هذا الحب الجارف أى عزول معارض له و يتسبب و
يشتم و يخون و ذلك لأنه مفسد للحظة الحب الورية ،

ومعارض للحبيب القديم الجديد ، و صاحب الحلم الضائع
العائد فى صورة هذا الضابط ، و يحكم الضباط مصر منذ أكثر

من ستين عاما أحسنوا أو أسأوا ، فإن قلوب المصريين المحبة لهذا الضابط تغفر له الإساءة مهما كانت و تعظم له أى شئ بسيط يعمل به ، و تحوله إلى هذا البطل الأسطوري ، و بدأ الحب يسري فى عروق المصريين له منذ أن دخل الكلية إلى أن حكم مصر ، ولا أعتقد أنه سوف تتغير صفة من يحكم مصر من ضابط إلى أي صفة أخرى ولا بعد مليون سنة .

لذا أقترح أن تدخل (مواد سياسات الحكم و السيطرة على الشعوب) ضمن مناهج الكليات العسكرية عسى أن نحظى بضابط دارس لفن الحكم المدني و ليس العسكري فى المستقبل.

الخاتمة



قال رسول الله صلى الله عليه وسلم «إن في الجسد لمصفاة
إن صلحت صلح الجسد كله وإن فسدت فسد الجسد كله ألا وهي
القلب»

وهذه المصفاة الصغيرة هي القلب - وما أفسد قلوبنا وأقساها
- فأصبحنا نطلب الرحمة من الله بعد أن رفعت من بيننا فكثرت
فيتا الأمراض النفسية ناهيك عن انتشار الأمراض العضوية ،
وكل منا يشعر أنه عبارة عن تركيبة كيميائية صعبة الفهم ويبحث
عمن يحل شفرتها ، وبالفعل أصبحنا نعاني عقدا فوق عقد وتفرغ
ما بداخلنا من ألم تسبب فيه أناس لهم قلوب قاسية ، في من
يدخل حياتنا بقلب مفتوح ونية صافية بلا أي ذنب مقترف.

فليصلح كل منا قلبه و يطهر جوارحه من الكراهية والغيرة
والحقد و الحسد و الاستغلال المادي والمعنوي أيأ كانت صورته
، و إذا أفلحنا فى ذلك ونجحنا فى إصلاح هذه المضغة الفاسدة
فلسوف تحل كثير من المشاكلات بلا جهد و نشعر بالسعادة
المفقودة بيننا .

و ليصلح أهل الدراما ما يقدمونه للناس من أفكار مسمومة
، فإذا كانت هذه الأفكار منقولة من واقعنا لسوء الأخلاق بيننا
فلا يوجد داع أبدا لنشرها و تعليمها للناس و بخاصة الشباب و
البنات ،

و إذا كانت محض خيال مؤلف فلا داعى مرة أخرى لفرض
الخيال المريض عن طريق الدراما على القلوب السليمة فتفسد و
تمرض معه ، و يزداد الأمر سوءا

انتقوا الأعمال الدرامية التى تصلح ما نحن فيه من أمراض
مجتمعية.

تنويه هام
واعذار

لقد أسردت في كتابي الكثير من السلبيات وذلك لظهورها
القوى في مجتمعنا ، ولا أنكر أن هناك الكثير من الشخصيات
العظيمة في مجتمعنا و التي تساعد الناس و تخدمهم بلا أي
مقابل مادي أو رغبة في شهرة أو مجد و، و تحب بإخلاص و صدق
و أنا أقدم لهم التحية و التقدير.

واعتذر لهم على التعميم في إصدار الأحكام ، ولكن تعلمنا
في الرياضيات أن نقرب العدد للأكبر والأكثر ، لذا قربت للأكثر
وليس للأصغر والأقل ، وذلك لأن الفساد منتشر وبكثرة ومن ثم
تكلمت بصيغة الجمع .

الفهرس

الإهداء	٣
المقدمة	٥
مرمر و كاری	٩
حب الفلاحین	١٥
حب العلماء	٢١
حب المشایخ	٢١
حب الوطن	٢٧
حب الحریم	٤٣
حب الروتین	٥١
حب الرغی	٥٧

حب الحياة ٦٥

الحب المستورد ٧٢

حب الحرية ٨٢

متفرقات عاطفية متناقضة ٩١

الأخوة الأحباب ٩٢

حب الراقصات ٩٧

حب التجار ١٠١

حب الإنترنت ١٠٥

حب العيال ١٠٩

حب الضباط ١١٢

الخاتمة ١١٧

تنويه هام واعتذار ١٢١

